



Kòman Pou Korije Dosye Salè Ou Nan Sekirite Sosyal

Ki sa ki andedan

Poukisa li enpòtan pou dosye salè mwen kòrèk?	1
Ki sa ki ta ka lakoz salè pa anrejistre sou dosye m?	1
Ki sa m ta dwe fè si salè m pa anrejistre sou dosye m?	1
Ki jan Sekirite Sosyal ka ede w?	2
Pou kontakte Sekirite Sosyal	2

Si w gen 18 an oswa plis, ou ka kreye yon kont *my* Social Security. Nan **www.socialsecurity.gov/myaccount**, ou ka jwenn *Deklarasyon Sekirite Sosyal* pou tyeke dosye salè w, epi wè estimasyon sou retrèt ou, envalidite ak benefis sivivan alavni. Ou ta dwe tyeke kont ou an avèk anpil atansyon pou asire w li endike montan ki kòrèk ou te touche chak ane epi pou asire non w ak dat nesans ou kòrèk.

Poukisa li enpòtan pou dosye salè mwen kòrèk?

Montan benefis Sekirite Sosyal ou menm oswa fanmi w resevwa depann de montan salè ki parèt sou dosye w. Si tout salè ou te touche pa sou dosye w, sa ka siyifi ou pral resevwa benefis Sekirite Sosyal ki pi ba pou ou menm oswa fanmi w.

Ki sa ki ta ka lakoz salè pa anrejistre sou dosye m?

Si salè ki pa sou dosye Sekirite Sosyal ou a se pou ane ki ankou a oswa ane ki sot pase a, ou pa bezwen enkyete w. Lefètke salè sa yo resan, nou ka poko anrejistre yo. Yo ta dwe parèt sou yon *Deklarasyon ki vin aprè*.

Sepandan, kèk salè ka pa sou dosye w pou ane ki pi ansyen yo pou youn nan rezon ki pral site anba a:

- Anplwayè w te itilize yon move non oswa move nimewo Sekirite Sosyal lè l t ap rapòte salè w.
- Anplwayè w te rapòte salè w yon fason ki pa kòrèk.
- Ou te vin marye oswa divòse epi w te chanje non w, men w pa t janm rapòte chanjman sa yo bay Sekirite Sosyal.
- Ou te travay avèk yon nimewo Sekirite Sosyal ki pa pou ou.

Ki sa m ta dwe fè si salè m pa anrejistre sou dosye m?

Si w dekouvri gen salè ki pa sou dosye w, premye bagay ou ta dwe fè se chèche prèv ou te touche salè sa yo. Prèv sa a se kapab:

- Yon fòm W-2 (*Deklarasyon salè ak taks*);
- Yon deklarasyon revni;
- Yon souchèk oswa bilten salè;
- Pwòp dosye salè w; oswa
- Lòt dokiman ki montre ou te travay.

Si w paka jwenn ankenn dokiman alekri ki montre salè w, eseye sonje bagay ki site anba a, epi ekri yo:

- Ki kote ou te travay;
- Non anplwayè w;
- Dat ou te travay;
- Ki valè kòb ou te touche; epi
- Non ak nimewo Sekirite Sosyal ou te itilize lè w te travay la.

Ki jan Sekirite Sosyal ka ede w?

Après w fin rasanble tout dokiman w yo oswa ou te fè yon lis tout enfòmasyon ou ka sonje, kontakte Sekirite Sosyal. Nou pral travay ansanm avèk ou pou korije dosye w. Pwosesis sa a ka pran kèk tan, toudepan de enfòmasyon ou pote ban nou konsènan salè w ki pa sou dosye w la. Nou ka oblije kontakte anplwayè w yo oswa nou ka mande w pou kontakte yo.

Pou kontakte Sekirite Sosyal

Genyen plizyè fason pou kontakte Sekirite Sosyal, san wete sou entènèt, pa telefòn, epi an pèsòn. Nou la pou n reponn kesyon w yo epi pou n sèvi w. Depi plis pase 80 ane, Sekirite Sosyal te ede sekirize lavi w jodi a ak demen lè l ofri benefis ak pwoteksyon finansye pou demilyon moun nan pakou y ap fè nan lavi yo.

Vizite sitwèb nou an

Fason ki pi pratik pou regle biznis nan Sekirite Sosyal nenpòt kote nenpòt lè, se lè w vizite sitwèb nou an www.socialsecurity.gov. Nan sit la, ou kapab:

- Kreye yon kont *my* Social Security pou egzamine *Social Security Statement* (*Deklarasyon Sekirite Sosyal*) ou a, verifye revni w, enprime yon lèt verifikasyon

benefis, chanje enfòmasyon pou depo dirèk ou, fè demann pou yo ranplase kat Medicare ou, jwenn yon ranplasman pou fòm SSA-1099/1042S, ak anpil lòt bagay ankò;

- Aplike pou jwenn Extra Help (èd siplemantè) avèk depans plan Medicare pou medikaman ou achte avèk preskripsyon;
- Aplike pou benefis retrèt, invalidite ak Medicare;
- Jwenn kopi piblikasyon nou yo;
- Jwenn repons pou kesyon moun konn poze souvan; ak
- Anpil lòt bagay ankò!

Kèk nan sèvis yo disponib sèlman nan lang anglè. Vizite Multilanguage Gateway (pòtay multilang) nou an pou enfòmasyon nan lang kreyòl ayisyen. Nou ofri sèvis entèprèt gratis pou ede w regle biznis Sekirite Sosyal ou yo. Sèvis entèprèt sa yo disponib kit ou pale avèk nou pa telefòn kit ou vini nan biwo Sekirite Sosyal la.

Rele nou

Si w pa gen aksè nan entènèt, nou ofri plizyè kalite sèvis otomatize, 24 sou 24, 7 jou pa semèn. Rele nou gratis nan **1-800-772-1213** oswa nan nimewo TTY nou an, **1-800-325-0778**, si w soud oswa ou gen difikilte pou tande.

Si w bezwen pale avèk yon moun, nou ka reponn apèl ou yo apati 7 è dimaten jiska 7 è diswa, de lendi a vandredi. Nou mande w pou pasyan pandan peryòd nou okipe anpil paske w ka jwenn plis siyal okipe epi w ka gen pou ret tann pi lontan anvan w gen opòtinite pou pale avèk nou. N ap tann pou n sèvi w.



Securing today
and tomorrow

Social Security Administration
Publication No. 05-10081-HC | July 2017
Kòmman Pou Korije Dosye Salè Ou Nan Sekirite Sosyal
How to Correct Your Social Security Earnings Record (Haitian-Creole)
Produced and published at U.S. taxpayer expense
Se lajan kontribiyab Ozetazini peye ki pèmèt yo pwodui epi pibliye piblikasyon sa a